


BIBLIOTEKA

Zakl. Nar. im. Ossolińskich

XVII

510



CONCIO
DE PASSIONE
DOMINI NOSTRI
IESV CHRISTI.

Excerpta

Ex tertio tomo Concionum, Sta-
nislai Grodicij SOCIETA-
TIS IESV.



CRACOVIAE,
Ex Officina Nicolai Lobij.
Anno Dñi. 1609.

5.442

XVII - 510 - II

CONCIO

DE PASSIONE DO-

MINI.

THEMA,

Ecce Homo. Ioan. 19. 5.



MAGNA equidem de causa, pri- Exemplo
Isaiz Pro-
phetæ.
Isaia 53. 8.
mus Prophetarum; qui Diuo Hie-
ronymo Euangelium texuisse vi-
sus est, conscripturus eam; cuius
hodie memoriam agimus historiam, ab his
illam orditur verbis. *Quis credidit auditui no-
stro? & brachium Domini cui reuelatum est?*
Quibus quid aliud agit, quam admirationem
in nobis excitat rei planè stupendæ? proin-
de infidelibus creditu impossibilis? nempè
quomodo is de quo paulò post, inquit: *Ge-
nerationem eius quis enarrabit?* ipse videlicet
Deus, tanta & talia pati debuerat; qualia &
ipse per spiritus prænotionem sciuerat, & nos
iam præterita recolimus. Hæc ipsa verò Tum Paull
Apost.
Rom. 5. 66
post modum D. Paulus demirans, causamq;
rei inuestigans inquit. *Ut quid enim Christus,
cum adhuc infirmi essemus, secundum tempus pro
impis mortuus est?* Hos igitur & veteris & no- Ad admirat.
impellimus
u testa-

PAS. DNI. NOSTRI IESV CHRI.

ui testamenti duces sanctissimos sequentes, eorumq; vestigia præmentes, nos quoque; quòd ipsi admirati sunt, suspicere in animum induximus nostrum. Ad quod præstandum, istud quòd audiuiſtis thema, breuè quidem verbis; at longum sensu, aptissimum mihi visum est. Prolatum autem fuit, vt noſtis, à Pilato: qui post sudorem sanguineum; quem **CHRISTVS IESVS** Dominus noster vberem in horto effudit: post captiuitatem, irrisionem, vapulationem, ac condemnationem eius ad mortem factam à Iudæis: post alterationem quoque; quàm satis longam habuit Pilatus cum eis; nec non, post missionem **IESV** ad Herodem, & remissionem ad Pilatum: imò post diram etiam flagellationem, coronationem, ac speciosæ illius faciei enormem per frequentes alapas ac percussiones, perq; sputa turpissima defædationem: post hæc, inquam, vniuersa, & alia quæ vobis meditanda relinquo, Pilatus volens ad commiserationem populum Iudaicum inducere, producens **IESVM** extra Prætorium exclamauit; **ECCĒ HOMO**. Ac si diceret; tam afflictus, tam malè tractatus, vt an homo sit vix discerni queat. Quomodo autem Iudæi hæc verba exceperint, in prima Concione disseruimus.

Thema ad
ad aptum.

Quando à
Pilato pro-
latum.

Et quo fine.

PROP:
Bipartita.

Nunc verò non Pilatus; sed nos: non ad Iudæos scelestos; sed primum quidem ad Deum Patrem; postea verò ad populum Christia-

Christianum ea dirigemus : sicq; in duas partes concionem hanc diuidemus. In quarum prima, tum miranda diuina iudicia, causasq; illorum inuestigabimus; tum amorem eius erga genus humanum demirabimur. In secunda verò, tum quisnam homo iste fuerit considerabimus, tum ad redamandum illum nos excitabimus. Da Christe IESV idita faciamus; vt amori tuo, quantum in nobis est respondentes, redemptionis tuæ participes in æternum effici valeamus.

Paulò antequam Pilatus verba hæc, **ECC E H O M O**, in medium proferret, steterunt coram tribunali, tum ipsius Pilati, tum Iudæorum, duo homines, alter Archilatro, & seditiosus & homicida, **B A R A B B A S** nomine; alter **I E S V S** Archisanctus: qui & mortuos ad vitam reuocabat, & pacificabat omnia. Quid factum? Post concertationes, hinc & inde vtrò citroq; habitas, tandem tum Iudæorum, tum præsidis sententia, **B A R A B B A S** nocentissimus absolutus; **I E S V S** verò innocentissimus Cruci adiudicatus est? **Mirandum**, nec mirum. Mirum, tantam cœcitatem inuasisse homines, & excellentes, & iudicio mundi prudentes. Etenim tum temporis homines orbis totius, in duas diuidebantur partes: in Iudæos, inquam, & in Ethnicos. Et Iudæorum quidem hic simpliciter erant omnium excellentissimi; nempè summus Pontifex, cum suo celeberrimo concilio san-

I. PARS,
ECC E H O M O Pater
æternæ.
Decretum
datum pro
Barabba cõ-
tra IESVM.

Mirandum.

PAS. DNI. NOSTRI IESV CHRI.

hædrin dicto : ex Ethnicis verò fuit Pilatus, vices gerens Tiberij Imperatoris : cui tunc totus penè suberat terrarum orbis ; quique vt est probabile ; non nisi viris, quos iudicabat sapientissimos, talia munia committebat. Mirum itaq; videri posset, tantos viros ad tantam iniustitiam delapsos fuisse : at ex parte altera, mirum non est, duplici nomine. Tum quòd iudicium istud hominum esset impiorum. atqui vtinam talia inter Christianos, aut non reperiantur, aut rarius saltem quam fit, eueniant ! tum, quod omnes isti non nosset, quis esset I E S V S. Nam teste

Nec mirandum.

1. Cor. 2.8

D. Paulo ; *Si cognouissent, nunquam Dominum gloria crucifixissent.* Quare hæc duo è contrario admirationem à nobis propulsant.

At decretū datū à Deo pro Adam cum omnibus sceleratis contra IESVM.

Verumenim verò hoc stupendum planè supra modum est. Stetisse ad tribunal sanctissimi, iustissimi, scrutantis *corda & renes* cuius *oculis omnia nuda & aperta sunt* Dei ; vna quidem ex parte, primum omnium parentē Adamum, cum tota sua progenie, nempè cū *peccatoribus, sceleratis, & contaminatis, patricidis & matricidis, homicidis, fornicarijs, masculorum concubitoribus, plagiarijs, mendacibus, periuris,* nec non incredulis, Idololâtris, blasphemis, hisq; similibus innumeris. Ex altera verò parte ; stetisse CHRISTVM IESVM, verbū æterni Patris carnem factum, purissimum, innocentissimum, virtuosissimum ; in quo nec peccatum vllum fuit, nec esse potuit : & ecce

Psal. 7.10.

Heb. 4. 13.

1. Tim. 1.9.

Joan. 1. 14.

profer-

profertur decretum ex ore altissimi ; vt ille quidem cum omnibus suis absolueretur ; hic verò pœnas pro eis lucret. Quo teste ? Ipso *Isa. 53. 8.* met Deo ; cum per Prophetam inquit ; *propter scelus populi mei percussit eum.* Et Apostolo Paulo, qui de eodem loquens Deo, ait : *qui etiam proprio filio non pepercit ; sed pro nobis omnibus tradidit illum.* Quid hîc audio ? Quid cogito ? Quid dicam ad ista ? Mens obstupescit, animus deficit, hæret lingua, tremunt labia, : sed animat me alter Propheta, his verbis alloquens Deum : *Iustus quidem tu es Domine, si disputem tecum ; verum tamen iusta loquar ad te. Quare via impiorum prosperatur, bene est omnibus qui præuaricantur, & iniquè agunt ? Est sanè quod demirare ô Propheta ; Deum impios exaltare, pios deprimere : Sanctos pati, scelestos verò, qui eos affligunt, lætari : sed audi nunc, ni ego fallor, longè quid mirabilius. Non solùm enim prosperantur hic impij ; quod tu miraris ; sed etiam ab omnibus suis impietatibus absoluuntur ; si volunt : iustus autem, innocentissimus, Filius deniq; Dei, morti turpissimæ adiudicatur ; vt illorum persoluat debita, vtq; Patri æterno pro ijs satisfaciât. Quis audiuit talia ? Quis ad hæc non obstupescat ? Quis nodum istum dissoluât ? Nam ad illud tuum ô Propheta, responderi potest ; prosperari hic impios, vt cum diuite epulone in æternum puniatur : *Leu. 16. 22.* pati verò hic pios, vt cum Lazaro gaudeant*

Rom. 8. 32

Stupendum sanè.

Quod si stupescat Ier. prosperitatē impiorū. *Ier. 12. 1.*

Hoc magis mirandum.

Nam illud soluitur hoc non tam facile.

PAS. DNI. NOSTRI IESV CHRI.

æuiternè, (Audiant hæc & intelligant quos parabola tangit) at verò dari pium pro im- pio, à pio & iusto iudice Deo, quis intelle- ctus capiat ?

Dei iudicia
alta.

O Pater æterne, ô Deus sapientissime; quàm alta sunt iudicia tua, & quis poterit ad ea? Si enim Prophetam minora angebant; qui nos grauiora & difficiliora non turbent! Quare sine me paucis tecum loqui, & parce, si quid insipienter effutiuero. Quid est quod tu pro nobis sceleratis, filium tuum ad tanta tormenta, quanta hodie recolimus, & ad ipsam mortem crucis turpissimam tradideris?

Urgetur dif-
ficultas.

Exo. 23. 7.

Insontem
non esse da-
mnandum.

Eze. 18. 20

Vnum pro
alio non ef-
sepuniédū.

Ergo.
Ibid. Ser. 2

Nonne in lege tua scriptum est; *Insontem & iustum non occides?* Quis innocentior ipsa innocentia: quis iustior CHRISTO IESV? An oblitus es, qui nihil obliuisci potes; quòd per Prophetam dixisti: *Filius non portabit iniquitatem Patris:* displicuitq; tibi olim Iudæos vertisse, *parabolam in prouerbium dicentes; Patres comederunt vuam acerbam, & dentes filiorum obstupescunt.* Nunc verò filius tuus portat iniquitatem & patrum & filiorum & omnium, & pro pomo acerbo, quòd comederunt primi parentes, dentes filij illorum IESV ab aceto & felle minis obstupescunt. O stupor, ô iudicia! Audiui quidem te dicentem; *propter scelus populi illum percussum fuisse.* At hoc non tollit, sed auget difficultatem. Nam iterum iterumq; peto & repeto: cur pro me meiq; similibus hominibus nequam, innox-

um fi-

ADMIRATIO ET AMOR.

9

um filium tuum tali morti adiudicasti? Etenim vel sunt tibi homines necessarii, vel non. Si sunt necessarii, (quod non puto) perde hos impios; & crea pios. Recordor te propter peccata carnalia olim dixisse; *Delebo hominem quem creavi à facie terræ, ab homine usq; ad animantia, à reptili usq; ad volucres celi: pœnitet enim me fecisse eos: delestiq; omnes, præter octo personas: hic verò cum sint scelera maiora, dele omnes & parce filio tuo sanctissimo, & innocentissimo: Sin verò non sunt tibi necessarii homines, prout non sunt; cum sine illis beatus fueris ab æternò; cur adeò affligis vnigenitum tuum, dilectum tuum, in quo tibi bene complacuisti? An non hunc occidere, maius & grauius est cæteris peccatis vniuersis?*

Homines potius delēdi omnes vt & rei, & nō necessarij.

Gen. 6. 7.

Mat. 17. 5

Parce mihi Domine, parce benignissime. Bonitas & altissima iudicia tua; malitia vero mea: innocentia dilecti filij tui; nequitia verò generis humani, cogit me isthæc loqui. Neque verò ego volo disputare tecum, aut contendere; cum sciam me non posse tibi respondere vnum pro mille: Sed volo demirari, facta tua, & ea quæ tu dederis communicare populo tuo; vt pariter omnes & timeamus iudicia tua secretissima, & ad amorem tui amore tuo exstimulemur: Itaq; testor inprimis, contra omnem hæreticorum perfidiam; me tenui & penè nullo ingenio & iudicio meo nolle metiri incomprehensibilia iudicia

Causa huius considerationis.

Iob. 9. 3.

Hinc tria.
I.
Protestatio.

Dei; multò minus autem naturam & essentiam ipsius proteruè inuestigare; sicut nunc prohdolor quidam qui se Christianos vocant, peius quàm olim Philosophi Ethnici faciunt. Deinde moneo omnes mihi in Christo charissimos, vt vos quoque idem faciatis: & tum iudicia vestra iudicio Ecclesæ, & eorum quos CHRISTVS IESVS ei præfecit, submittatis humiliter: tum iudicia diuina metuatis grauiter, neque dicatis vt soletis: Quid est hoc? quantulum est istud peccati? num propter hæc irasci deberet Deus? istanè adeò vt dicitur punientur? & his similia, quæ conscientiæ vestræ, & sermones quotidiani norunt. Abstinetes ab istis obsecro, confide-

2.
Admonitio

3.

Vetz causa
mortis Christi
& diuisio
sequentiu.

rantes; quæ & quales sint censuræ diuinæ. Postremò dico vt in omnibus diuinis actionibus; ita etiam in ista; imò multò magis in ista, non esse iniustitiam, sed iustitiam esse: non crudelitatem; sed miserirordiam: non insipientiam; sed summam sapientiam. Esse insuper & exaltationem IESV, & summam erga nos charitatem eius ac dilectionem. Hæ sunt causæ mortis Christi ex parte Dei; quas demiror, quas laudo, quas exalto: vtq; vos idem faciatis, rogo & moneo. Præsentes estote, & animis & auribus, dum hæc excutio: dabit Deus, & mihi sufficienter loqui, & vobis vtiliter audire.

PROBA-
T. HIC.

Itaque percurram inprimis hæc puncta: postea exemplo & antithesi dicta illustrabo
vt om-

Ut omnes, quantum fieri potest rem intelligant, nosq; scopum nostrum attingamus. *Faxit IESVS.* Porro nullam hic esse iniustitiã patet. Nam quicquid volenti; imò vltro sese offerenti fit, non iniuste fit. Ita verò hic se res habuit, teste & nouo & veteri testamento. In hoc (inquit) *Propheta oblatus est; quia ipse voluit.* In nouo verò, ipse IESVS ait: *Pono animam meam,* (vitam videlicet. Id enim anima frequentissimè in scriptura significat) *ut iterum sumam eam. Nemo tollit eam à me.* Quid? nonnè violenter Iudæi cū Ethnicis tibi illam abstulerunt? Imò, nonnè ipse Deus Pater id ita fieri voluit? Respondet IESVS: *Ego pono eam à meipso: & potestatem habeo ponendi eam, & potestatem habeo iterum sumendi eam.* Quapropter tam respectu Dei Patris, vltro me expono ad omnia (quòd paulò antè illis testatus est verbis; *propterea diligit me Pater; quia ego pono animam meam:* id est, quia voluntariè me ad hæc obtuli) quam respectu impiorum, libere ago vniuersa: nisi enim ego voluissem, illi ne vnum quidem capillum capitis mei euulsissent: Laudemus igitur & gratias agamus eius charitati dilectissimi, qui nostri causa tanta ex puro suo amore suscepit & sustinuit. Non fuit igitur hic iniustitia vlla; sed fuit iustitia exactissima, per quam sicut Pater pro peccatis Adæ ac posterorum eius omnimodam exegit satisfactionem: ita filius assumpta in se eadem quæ peccauerat natura,

1.
Non esse iniustitiã

Quia vltro se obtulit Christus.
Isa. 53. 7.
Teste propheta & ipso.
Io. 10. 17.
NOTA.

2.

Non esse autem iustitiã rigidissimã,

natura, tam rigidæ per omnia Patris respondit desiderio; vt nihil penitus posset requirere amplius. O mira & miranda diuina dispositio! Pari ratione nulla hic fuit sæuitia. Nō enim ad qualemcunq; satisfactionem præstādam filius patri se obtulit; sed ad eam quam hodie deuota & amara mente recolimus. Quæ causa? Duplex. Altera iam dictus rigor iustitiæ. Nam quemadmodum homo omnibus, tum corporis tum animæ viribus, potentijs, affectibus, sensibus, membris diuinam offendit maiestatem; ita Deus Homo factus, in omnibus istis pati, Patriq; pro nobis satisfacere voluit. O iustitia, o misericordia stupenda! Alteram causam assignat Dauid; nempè, vt esset *copiosa apud eum redemptio*. voluit enim copiosè, & abundanter, & superabundanter pro nobis satisfacere: quod & fecit. Non crudelitas ergo, sed bonitas & misericordia fuit infinita; quam exhibuit erga genus humanum amator hominū homo Deus; tum miserendo nostri, qui aliās in æternum perijssemus: tum omnia quæ commeruit liberaliter donando nobis, benedictus in secula.

3.
Non esse
crudelitātē.

Ps. 129. 7.

4:
Sed esse mi
sericordiā.

Exemplo si
mili hæc de
clarantur.

Declarari & explicari hæc possunt exemplo principis, vel regis alicuius; qui videns populum suum in periculo internecionis positum, ipse se pro illo opponeret: & singulari inuito cum hoste certamine, licet ipse multis confectus vulneribus occumberet; ita ta-

men rem

men rem ageret, vt & victoria penes eum remaneret, prostrato contrariæ factionis principe: & populum suum non solum liberaret, sed etiam exuuijs hostium abundanter ditaret. Quanta esset huius Principis erga populum suum, tum misericordia, tum charitas, tum liberalitas? Id ipsum hic à CHRISTO IESV factum omninò vides; eo insuper addito, quòd & vltro tot tormenta suscepit, cū ab illis liber esse posset. & non populo tantū suo, sed etiam sibi inde aliquid in assumpta natura acquisiuit emolumenti. Etenim propter hanc humiliationem IESV vsq; ad mortem crucis, teste D. Paulo; *Deus exaltauit illum, & donauit illi nomen; quod est supra omne nomen: vt in nomine IESV omne genu flectatur, cœlestium, terrestrium, & infernorum.* Proinde hæc est quoque vna ex causis, ex parte, Dei passionis Christi.

5.
Esse insuper
exaltationē
nominis
IESV.

Phi. 2. 8.

Prætereanon est hic insipientia; quæ videri posset in eo, quòd excellentior persona, pro viliori ad tormenta substituitur: sed est summa sapientia; quòd tum ex iam dictis, & exemplo allato clarum; tum ex sequentibus clarissimum euadit triplici nomine. Principio, respectu Sathanæ: qui sicut in ligno vicerat; ita sapienter modo simili in ligno victus est: vt canit Ecclesia. Quod futurum prænotauit ipse Deus, dicens Iobo. *An extrahere poteris Leuiathan hamo, & fune ligabis linguam eius?* Ac si diceret: tu quidem id facere non va-

6.

Non insipientiam sed sapientiam esse tribus modis.

Tum respectu Sathanæ
Iob. 40. 20

non vales; at veniet, qui perficiet: nempè Filius meus homo factus; qui Leuiathan, id est dæmoni obijciat humanitatem, qua ipse pasci aſuetus est: cumq; eam Sathan inuaſerit, & deuorare tentauerit, ab intus latente diuinitate tanquam hamo, & capiatur & extrahetur, perdetq; ius quod habuit erga nocentes; eò quòd innocentem afflixerit: ſicq; fune ligabitur lingua eius, vt per ſuggeſtiones ſuas tantum, quantum antea non queat nocere. Id hodie per CHRISTVM IESVM in Cruce, ſapientiſſimè factum eſt. Secundò apparet ſapientia reſpectu Dei, & generis humani. Sapientiſſimè enim prouidit incommodo illi, quòd ſubſecutum fuiſſet; ſi per creaturam (per quam tamen, eo quòd nunc modo; nempè ex rigore iuſtitie, peragi non potuiſſet) redemptio perfecta fuiſſet. Quid verò erat iſtud incommodi? Magnum fanè. Tunc enim homo creationem quidem ſui, & quod habet eſſe naturale Deo creatori: redemptionem verò; & eſſe ſupernaturale, creaturæ illi, à qua redemptus fuiſſet. adſcripſiſſet. Cuius rei inconuenientiam quis non videt? Poſtremò elucet ſapientia, reſpectu omnis creaturæ. Conuenientiſſimum enim erat, vt ſicut per verbum facta ſunt omnia; ita per verbum reſtaurarentur omnia. Quo *Heb. 2. 10.* aſpexiſſe videtur Paulus, cum inquit: *Decebat enim eum, propter quem omnia, & per quem omnia, &c. per paſſionem conſumari. Qui enim ſanctificat,*

Tum reſpectu Dei & redemptioni.

Tum reſpectu omnis creaturæ.

Sanctificat, & qui sanctificantur ex vno omnes. Omnia enim in cælo, & in terra per passionem IESU, & per sanctificationem, & alia quæ inde profluunt restaurantur. præsertim cum in homine aliquid sit omnis creaturæ; vt & S. Patres, & ipsa ratio docet. Deniq; charitas Dei Patris, & Filij, & Spiritus Sancti, erga genus humanum, ita hic declaratur & resplendet; vt huic cum primis attributo, totum hoc negotium adscribere videatur Apostolus; qui cum dixisset: *Charitas Dei diffusa est in cordibus nostris, per Spiritum Sanctum qui datus est nobis: paulò post subdit. Commendat autem charitatem suam Deus in nobis; quoniam cum adhuc peccatores essemus, Christus pro nobis mortuus est.* Est igitur quod diuinæ ipsius bonitati gratias agamus: est quòd amorem pro amore reddamus: est quòd sanctissimam ipsius iustitiam, misericordiam, sapientiam, & charitatē, cōtra infideles & impios defendamus.

7.
Esse hic specimen maximæ in no-
charitatis
Dei.

Rom: 5. 5.

Ibid. Ver. 8.

Id verò, quia pro nostra virili parte iam fecimus; nunc ad Deum Patrem sermonem nostrum conuertamus: & tum dicta & the-
ma antithesi declaremus; tum affectus, cum primis verò amorem nostrum ad gratias exhibendas Deo in nobis excitemus: tum misericordiam diuinam ad miserendum humano generi flectamus: Vnde verò ordiemur? Ab ipsa rerum omnium creatione. Duas creaturas excellentes condidit Deus; nempe Angelum & hominem: quæ cum sint ratione præ-

Pathos ad
commouē-
dam mise-
ricordiam
Dei.

Historia cre-
ationis.

Casus An-
gelorum.

Casus ho-
minis.

Gen. 3. 1.
Homo post
casū miser.

Psal. 48.
13. & 21.

1.
Sine honore

2.
Similis be-
stij

3.
Imo ijs mi-
serior.

ne præditæ, solæ illum agnoscere, amare, & laudare possunt in æternum. Reliqua verò quæ cæli & terræ ambitu continentur; ad subsidium hominis creata esse nostis. Quid verò postea factum fuerit; ne id quidem ignoratis: nempè eam quæ prior creata fuit, non quidem totam; bona tamen ex parte duce Lucifero, propter suam superbiam, qua similitudinem Dei appetiuit corruisse: indeque ex pulchro Angelo, fœdum dæmonem factū esse. Creata est postea altera, humana videlicet; quæ prioris sedes in cælo occupare, & supplere posset. Id videns Lucifer, ringitur, & fert ægerrimè: ac proinde in forma serpentis appropinquans Euæ, cum ea sermones miscet; suadet, vt neglecto diuino mandato, comedat de fructu ligni vetiti; promittens mendaciter, si id cum marito fecerint, eos futuros sicut Deos, scientes bonum & malū. Quid multis? Persuadet mulieri; cui Adam condescendens, comedit pariter cum ea: & incidunt in miserabilem quendam statum. In illum videlicet; quem postea descripsit David, dicens, & bis in eodem Psalmo repetens: *Homo cum in honore esset non intellexit: comparatus est iumentis insipientibus, & similis factus est eis.* Atqui vtinam similis tantum; & non deterior & miserabilior ijs: sed proh dolor; resonant in auribus verba, quæ Filius Dei heri ad Iudam & de Iuda protulit, dicens: *Bonum erat ei, si natus non fuisset homo ille: quòd de omnibus præ-*

bus præuaricantibus legem Dei, & non pœnitentibus, recte intelligitur. Quare possumus nos nostro modo hic quoque exclamare: **ECCĒ HOMO**, qui voluit habere scientiam diuinam, & factus est bestia insipientior: qui similis Deo esse ambiuit, & bruto animali deterior euasit. **ECCĒ HOMO**, delusus à dæmone, accusatus ab Angelis, irrisus à Deo. Quomodo? Miro sanè modo. Indutū enim veste pellicea ridet: & inquit vna, ad alias diuinas personas: **ECCĒ Adam quasi vnus ex nobis factus est, sciens bonum & malum.** O misera hominis conditio! O quam funestum est non obedire Deo creatori suo, etiam in ijs quæ res minutæ esse videntur? Quid ergo? *Nunquid in æternum proijciet Deus, aut non apponet vt complacitior sit adhuc? aut in finem misericordiam suam abscindet*, & vno ictu perdet totam humanam naturam; quã ad imaginem & similitudinem suam condidit? **ECCĒ HOMO**: O Deus omnipotens & misericors, miser & miserabilis homo: miserere igitur ipsius, adeò abiecti, adeò humiliati. Dignus est enim comiseratione & misericordia homo: qui licet voluntariè; non ex malitia tamen, vt Sathan; sed ex fragilitate delusus ab alio peccauit. Facerem respondet Deus; sed obstat iustitia, cui vt fiat per omnia satis necessum est. Hic intercessit colloquium inter diuinam, tum iustitiam, tum misericordiam, & alia his similia pulchra;

4.
Delusus à dæmone.

5.
Accusatus ab Angelis
Gen. 3. 22.

6.
Irrisus à Deo.

Pf. 76. 8.
Misericordia Dei imploratur.

Causa additur, sed

Obest iustitia.

Bern. ser. 12
de Annũ.
B. V.

quæ sancti contemplantur, præsertim D. Bernardus, qui videndus erit : nos verò ea omit-
timus, ne nimium longi simus : Itaq; pergo &
dico. At quis obsecro ò Deus, iustitiæ tuæ
pro tam graui & iusta offensa respondere po-
terit ? Num aut Angelus, aut quæuis similis
natura ? At indecens omninò videtur ; vt a-
lia peccante alia reconciliet. Num eadem ?
sed non est qui faciat bonum, non est vsq; ad vnum.

Nec est qui
eisatisfaciat
Ps. 13. 2.

Eccl. 3. 4. 4

Et verò, si ab immundo, teste scriptura, nemo
mundabitur ; quantò magis nemo redimetur ?
An verò aliquem hominem innocentem cre-
abis ? At ne hac quidem ratione quicquam ef-
ficiemus ; iuxta illum quem tu requiris iusti-
tiæ rigorem. Quomodo enim pro culpa in
illum, qui dignitatis est infinitæ, commissa, à
finita creatura fiet satis ? O quàm vndiq; ab
hac tua iustitia constricti sumus, Deus omni-
potens ! O desendum & miserandum sta-
tum nostrum, Deus misericors !

Quæritur
qui soluat.

Ezech. 23.
30.

Itaque petimus, vt tu ipse quæras illum,
qui id præstet : O omnia sciens Deus. Quære
obsecramus. Quæsiui, respondet per Prophe-
tam, virum qui interponeret sepe, & staret oppo-
situs contra me pro terra, ne dissiparem eam ; &
non inueni. O nos miseros ! Quid igitur fa-
cies ? Ait ; Et effudi super eos indignationem meã.

Deus olim
non reperit
ideo vult
irasci.

Expecta Domine, expecta obsecro misericor-
dissime Pater, & ne perdas quod creasti. Ex-
pecta ne effundas iram tuam : quis enim fini-
tus furorem tuum infinitum sustinere pote-
rit ?

rit? Audi & exaudi, & miserere. Etenim
 fortè nos inueniemus illum. Tu non inueni-
 sti: quia tum temporis nedum reperièbatur,
 at nunc est qui id faciat, & abundanter perficiat.
 Quisnam? Is de quo Pilatus: **ECCĒ**
HOMO: quem olim Prophetes tuus voca-
 bat bis hominem, dicens: *Homo & homo natus*
est in ea, & ipse fundauit eam altissimus. Est er-
 go non solum homo, sed & Deus altissimus,
 tibi consubstantialis, connaturalis, cœter-
 nus: hic iam & natus, & passus est pœnas
 crudeles, pro genere humano. **ECCĒ HOMO.**
 Quæsiuisti ò Deus iustissime *virum, qui interpo-*
neret sepe; **ECCĒ HOMO** pendens in cru-
 ce: seps enim ex lignis fit. Quæsiuisti, qui
staret oppositus contra te pro terra, & auerteret i-
 ram tuam: **ECCĒ HOMO**; qui quia homo
 est, terræ aliquid habet: quia verò etiam De-
 us est; potest tibi per omnia satisfacere, in
 summo iustitiæ rigore. En se opponit in aë-
 re, maximis cum doloribus, pendens inter
 nos & te, *Mediator Dei & hominum, homo Chri-*
stus IESVS: qui dedit redemptionem semetipsum
pro omnibus. Ne dissipes igitur terram; sed mi-
 serere. Offendit te ille homo, reconciliet te
 iste homo. Ille homo à serpente est sedu-
 ctus: **ECCĒ HOMO**, qui decepit serpen-
 tem, obijciens ei formam serui, & capiens il-
 lum forma Dei; vt iam dixi. Ille homo fuit
 accusatus ab Angelis, propter peccatum: **ECCĒ**
HOMO, quem suo modo deslebant An-

Inuenimus iam nos.

Eum de quo Pilatus, **ECCĒ HOMO** qui abunde satisfaciens: quia *Ps. 86. 5.*

1. Est etiam Deus.

2. Ponit sepe.

3. Opponit se in aëre.

4. Mediator est.

1. *Tim. 2. 5.*

5. Serpenti illudit.

6. Angelos ad fletu commouet.

7.
Rideri à
Deo non
potest.
Isa. 33. 7.
Gen. 3. 22.
8.
Nec subesse
dæmoni.

9.
Sapientissi-
mus, &c.

Heb. 1. 3.
10.

Qui potest
mittere in
piscinam.
Ioan. 5. 7.

Pf. 84. 10.
Conclusio
offerendo
Patri Filiū
& miseri-
cordiam
imploꝛado.
2. Cor. 5. 21

geli, cum deleret peccatum. Ille homo in-
dutus pelliceis, irrisus est à te ô Deus Pater:
ECC E H O M O, nudus pendens in Cruce,
qui rideri non potest; cum sit tibi per omnia
par & æqualis. Ille homo, cum tota posteri-
tate sua fuit in potestate dæmonis; qui ad
innumeras myriades scelerum & peccatorū
eum impulit: ECC E H O M O, in quo *prin-*
ceps tenebrarum nec habet nec habuit vnquam
quicquam. Ille homo insipiens, & similis be-
stis factus est. ECC E H O M O, qui ipsa est
tua sapientia, & *figura substantiæ tuæ*. Audiui,
ô Pater Omnipotens, conquestū fuisse olim
quendam se non habere hominem, qui illū
mitteret in piscinam, quinq; porticus haben-
tem, quando commouebatur aqua; vt sani-
tatem reciperet: quæ quidam sanitas, non a-
liunde quam à te proficiscebatur. At nunc,
ECC E H O M O, quinon solum potest nos
mittere in piscinam; sed ipse factus est no-
bis eiusmodi piscina, quinq; porticus habēs;
duas in manibus, duas in pedibus, quintam
verò in latere dextro: quæ etiam mouetur
perpetuo & incessanter: continuo enim me-
rita ipsius stant in conspectu tuo.

Quapropter clamo cum Propheta. *Pro-*
rector noster aspice Deus, & respice in faciem Chri-
sti tui. Nos quidem peccauimus ô Pater San-
cte, at ecce is qui non peccauit & pro pecca-
tis omnium satisfecit, quem tu ipse *peccatum*
fecisti vt nos à peccatis liberares, Aspice igi-
tur il-

tur illum & miserere nostri, *Respice obsecro* **NOTA.**
in faciem Christi tui, & vide oculos liuidos, au-
 res spinis confossas, genas consputas, labia
 pallentia, linguam arentem, vocem raucam,
 guttur amarum, caput vulneratum, totum
 corpus lancinatum, animam afflictam nimis:
 deniq; manus pedesq; clavis confixos, & la-
 tus inerte crudeli lancea vsq; ad cor transf-
 uerberatum. Hæc inquam intuere. O iustif-
 sime Deus: & condona; quicquid oculis no-
 stris procacibus, lingua blasphemata, mani-
 bus rapacibus, pedibus currentibus ad facien-
 dum mala; omnibus deniq; sensibus, affe-
 ctibus, potentijs, membrisque tuam offen-
 dimus iustitiam & bonitatem. Parce Do-
 mine parce & miserere ijs, quos filius tuus
 precioso suo hodie emit sanguine. Nonne *Nau. 1. 9.*
 de te scriptum est; *non vindicabit bis in idipsum.* *ix. 70.*
 Vindicasti igitur & puniisti hæc omnia in
 filio tuo; ne secundo adijcias puniri ea in no-
 bis, iuste, & in dictis veracissime Deus.

Tu verò o pop: Christiane; ad te enim **II. PARS.**
 meum iam conuerto sermonem: quid hæc **ECCE HO-**
 audiendo cogitas? quæ mens, quis animus **M O, o**
 est tibi? Audisti quid Deus tui amore egerit; **Christiani.**
 quid tu vicissim ipsius causa facies? Adhucné
 in peccatis manebis? adhucné in sceleribus
 sordesces? adhucné tantorum beneficiorum
 ingratus eris? Quid? putasné, quia audisti **Quomodo**
 Deum non vindicare bis in idipsum, te iam **Deus non**
 peccantem & non resipiscentem à pœnis libe- **vindicat bis**
 rum fo- **in idipsum.**

PAS. DNI NOSTRI IESV CHRI.

rum fore? O quàm stulte erras, si id sentis. Eorum enim tantum peccata vindicantur in Christo, qui fide & charitate coniuncti sunt Christo: quòd si alterutrum tibi deest, non bis, sed semel ea puniet Deus: nec in alio, sed in temetipso: nec temporaliter, vt in Christo; sed in æternum, vt in inimico Christi. Vide igitur quid agas, & consule tibi, ac reconciliare, quæso, per sacramenta Christo; vt meritorum & pœnarum ipsius particeps esse queas.

Scopus sequentium & propositio quadripartita.

Cæterum, vt & me, & vos omnes mihi in Christo charissimos ad compunctionem, cum illam quæ ex timore & dolore; tum eâ quæ ex charitate & amore prouenit, excitem, ad singulariâ descendo: & ostendo, tum quânam sit iste de quo ait Pilatus; ECCE HOMO: tum quânam nostri causa sustinuerit: tum quò cum amore hæc perfecit omnia: tum denique quid nos ei retribuere debeamus.

PRIMO quis fuerit iste homo, nempe Homo supra homines; quia Deus. Bar: 3. 36.

Itaque clamo ad te ô pop: Christiane: ECCE HOMO CHRISTVS IESVS. Homo inquam, supra omnes homines: quia etiam Deus: vt modo ex Dauide audiuiisti. cui adstipulatur alter Prophæta dicens. *Hic est Deus noster.* Quid verò hic Deus noster fecit? Respondet. *Post hæc in terris visus est, & cum hominibus conuersatus est.* Nôris ergo de quo nobis erit sermo, quantus ille sit. Is videlicet, *per quem omnia facta sunt, & sine ipso factum est nihil, teste nostro Ioanne.* Qui brachio suo &

Ioan. 1. 3.

suo & manu excelsa, quæ non operatus est miranda & mirabilia? Nunc verò manus istæ, en clavis cruci affixæ sunt. O stupor! Propterea clamo secundo: **E C C E H O M O**: non solum Deus sed & homo verus: homo quia carne & anima constans: quia *per omnia fratribus* assimilatus, teste Paulo: quia ingentes dolores sentiens; vt tum ex agonia, tum ex tota historia hodierna patet. Deniq; vtrumq; hoc, **E C C E** expressit Ioan. cum inquit. *Quod fuit ab initio*: quibus verbis diuinitatem eius ab initio, sine initio existentem notauit: de humanitate verò subnectit dicens: *quod audiuimus, quod vidimus oculis nostris, quod perspeximus, & manus nostræ contrectauerunt.* Hæc enim omnia hominis sunt propria. Cæterû, cogita quæso, hunc ipsum hominem, etiam secundum naturam istam, non qualemcunq; hominem fuisse; sed ortum fuisse ex profapsijs, quibus in mundo nihil fuit excellentius. Progenitus est enim à Patriarchis, Prophetis, & à Regibus. Scias igitur, non solum ex primo, quatenus Deus est; sed etiam ex isto capite, quisnam fuerit hic, qui talia qualia hodie recolimus, propter nos & propter nostram salutem sustinuit. Quid verò sustinuit? Respondet Propheta. *Cornua in manibus eius.* Stupendum quid sanè: quis enim audiuit vnquam, aut hominem vllum in manibus, aut etiam bestiam vllam, in anterioribus pedibus, qui illis loco manuum sunt, cornua gestasse?

Homo cum hominibus quia homo verus.

Heb. 2. 17.

1. 20. an. 1. 8

Attemen ex illustrissimis profapsijs.

Contemplant ergo quis patitur.

Hab. 3. 4.

SECUNDO

Quæ nostri
causas susti-
nuit.Homo non
homo.

Psal. 21. 7.

Sed vermīs.

Tribus de
causis.Primo quia
abominabi-
lis factus &
atritus vt
vermis.

y.

In hortō
multis no-
minibus.

Est certè quod miramur, propterea au-
di tertium : **E C C E H O M O** : nempe Homo
non homo. Quid sibi hæc contraria volunt?
Non mea sunt; sed ipsius Dei in scriptura ex-
pressa. Hominem illum esse iam audiisti :
non hominem verò nominari, audi ex ore
ipsiusmet **I E S V** dicentis. *Ego autem sum ver-
mis, & NON HOMO.* Audis quomodo
& non hominem se esse asserit, & vermem se
esse ait? in illo Psalmo qui totus est de Passi-
one ipsius, quique ab illis verbis incipit: *De-
us, Deus meus quare me dereliquisti: Quæris for-
tè cur se vocet vermem? Respondeo; mul-
tas huius rei dari à Doctoribus causas & ra-
tiones: at nos tribus contenti erimus; quas
ex historia hodierna libabimus potius, quã
tractabimus. Itaque primo vermīs proprium
est horrorem quendam incutere hominibus;
indeq; abominationem. Quo fit vt siquidem
vermis ille magnus fuerit scindatur, & in
multas secetur partes: si verò parvus, con-
spuatur, vexetur, ac tandem pede ita conte-
ratur; vt quidnam fuerit non agnoscatur.
Abominationem expressam habemus in se-
quentibus Christi verbis. Postquam enim
dixisset se esse vermem, subiungit; *opprobri-
um hominum, & abiectio plebis*: nempe factus
sum. Id verò nos in actu hodierno tam clare
videmus, quàm quod clarissimè. Tangamus
aliquot capita, vnde & iam dicta, & cætera e-
iusmodi appareant. Incipiamus autem ab i-
ipso hor-*

plo horto. Ibi enim I E S V S tum facie, tum toto corpore hæret terræ, ad instar vermis: ibi ter eundo & redeundo ab Apostolis mouetur, & gyratur præ angustia, vt vermis: ibi denique defudat, sanguine: quòd an aliquis vermis faciat nescio: illud scio, eum tum temporis vix formam hominis habuisse, & propterea ministri, qui ad capiendum eum venerant: imò fortè & ipse Iudas, eum non agnouerunt, donec diceret: EGO SVM: licet alias fuerit eis bene notus. O mira diuina dispositio. O stupenda humilitas & charitas tua, erga nos bone I E S V: qui vermis fieri voluisti; vt & nos sciamus, quomodo nos pro vermibus reputare, & vermiculi vermiculum diligere debeamus. Fac omnipotens vt faciamus.

Ducitur inde Dominus I E S V S noctu per saxa: imò vt contemplatiui meditantur; ^{2.} In itinere & apud Iudæos. corruens præ impetu, ab illa incitata & furiosa licetorum turba trahitur per terram, vt vermis; totaque illa nocte identidem percutitur, vt vermis: conspuitur vt vermis: calcibus petitur vt vermis: ac demum velatur facie, ne quisnam sit agnosci queat. At verò in prætorio apud Pilatum, multo plura talia habemus. ^{3.} Apud Pilatum, in flagellatione. &c. Obmutescit ad accusationes aduersariorum; vt piscis & vermis. Data deinde à Pilato, sicut iniqua ita sæua sententia; vt licet innocens, flagellaretur tamen, spoliatur vestibus suis, & nudus apparet, sua tantum pelle

pelle contactus, vt vermis : tum innumeris
 pæne flagellorum ictibus discinditur caro
 I E S V , vt disseccari consuevit caput serpentis,
 vel alterius vermis: conspuitur denuò vt ver-
 mis: arundine caput feritur, vt vermis: ad
 extremum ita in corpore & facie laceratur &
 defædatur, vt an homo sit, vix dignosci pos-
 sit: indeque vt iam diximus, hæc verba Pila-
 ti: **E C C E H O M O** processerunt. Quo tem-
 pore illud Isaiaë expleri cœptum est: *Non est
 ei species, neq; decor: & vidimus eum, & non erat
 aspectus, & desiderauimus eum: Despectum &
 nonissimum virorum: virum dolorum, & scientem
 infirmitatem: & quasi absconditus vultus eius &
 despectus: vnde nec reputauimus eum.* Ita vt &
 ipse Ethnicus homo, Idololatra, vix eum
 pro homine agnosceret. Hæc verò om-
 nia tui causa, ô popule Christiane facta sunt.
 Proinde clamo: **E C C E H O M O**: **N O N**
H O M O; sed vermis, propter te tam male
 tractatur: & vt vermis discissus, & pede quasi
 attritus est. O anima Christiana, Vide ergo
 quid illi respondeas gratitudinis causa.

Vbi incipit
 expleri pro-
 phetia.

1/a. 53. 2.

4.

In monte
 Caluarie
 maxime.

Sed nondum finis. itur & peruenitur ad
 montem Caluarie, vbi eiusmodi multa vi-
 suntur: fessus, & præ onere corruens in ter-
 ram I E S V S, vna cum Cruce, vt quidam vo-
 lunt, iterum trahitur vt vermis: postea non
 misericordia; quia omninò ea caruit gens il-
 la impia, permota; sed timens, ne si I E S V S
 in itinere moreretur, ipsa suo frustraretur de-
 lyderio,

Syderio? quo ardebant, vt viuus cruci affige-
 retur, crucem ferendam imponunt alteri: IE-
 SVS verò ducitur, & perducitur ad locum
 extremi supplicij: vbi denuò non iam aliqui
 bus tantum, vt prius; sed omnibus omninò
 visendus exponitur, nudus, vt vermis: po-
 stea stipiti, seu cruci imponitur, & in signum
 erigitur; vt olim serpens ille Mosaicus: quã
 figuram ipse CHRISTVS IESVS sibi ap-
 plicat. Serpentes autem genus quoddam
 vermium esse quis ignorat? deniq; ita affligi-
 tur & atteritur; vt ibi demũ Prophætia Isaia, Num. 21. 9
Vbi & figu-
ra Moſis.
 quã iam attulimus perfectè impleta fuerit. Io. 3. 14.
Iſa. 53. 10.
Et dictum
Iſaia perfe-
ctè com-
pletur.
 propterea paulò post idẽ subiũgit; & *Domini-
nus voluit conterere eũ*: nempè quemadmodũ
 vermis pedibus conteritur, vt quid fuerit
 vix agnoscat: ita suo modo Dñs, IESVS.
 Dicitur autẽ sic voluisse Deum illũ cõterere:
 quia conterendum Iudæis & Ethnicis permi-
 sit: imò suo modo tradidit. Itaq; iterũ cla-
 mo: **ECCĒ HOMO**, ô Christiane, propter
 te sic contritus; vt quasi **NON HOMO** æstima-
 retur: Intuere igitur illũ: despectus fuit à su-
 is Iudæis, ob quos inprimis venerat: sit hono-
 rat tibi, qui in eorũ locum successisti: vide-
 runt eum illi, *noũssimũ virorũ*: videas tu eum
 præstantissimũ omnium, qui fuerunt, sunt, &
 futuri erunt hominum. Aspexerunt illi eum,
virum dolorum & scientem infirmitatem; noris tu
 quoque tum condolere ei; tum dolores pro
 illo etiam voluntarios suscipere: tum scire &
 portare

Cohortatio

portare infirmitates aliorum. Fuit illis *absconditus vultus eius*; sit tibi apertus, vt illum noctu atq; interdiu iutuëaris, & ad normam eius vitã moresq; tuos dirigas: deniq; ipsi nõ reputauerunt eũ; tu reputa, & adora, vt Deum, vt redemptorem, vt conseruatorem, vt authorem salutis tuæ

Secundò,
vermis fuit
quo captus
est Leuiathan.
Iob. 40. 20

Deinde vermem se vocat: quia ipso tanquã vermiculo captus est Sathan, & ligatus: sicut ex Iob audiuius, Nostis enim, eũ qui piscem hamo capere desiderat, hamũ vermiculo cooperire consueuisse: ita fecit hic vermiculus noster CHRISTVS IESVS; qui cum diabolum ipsumq; Luciferũ Leuiathan, balenæ videlicet marinæ comparatũ, capere velet, hamum diuinitatis suæ cooperuit vermiculo humanitatis suæ; quã dũ deuorare vult Sathan, & capit, capitur: de quo plura superioris diximus, ex D. Gregorio, Beda, & alijs.

Tertio, vermis fuit ob teneritudinem.

2. Re. 23. 8
Figura in
Dauid
pulchra
nimis.
NOTA.

Postremò, comparatur vermi propter teneritudinẽ. Scimus enim cũ experientia; tum è scriptura, vermem rem tenerrimã esse. Nã in laudibus Dauidis, figurã Christi gerentis, dicitur: *Dauid sedens in cathedra sapientissimus princeps inter tres; ipse est quasi tenerrimus ligni vermiculus, qui octingentos interfecit impetu vno.* Pulcrum elogiũ Dauidis; sed multò pulchrius filij Dauid CHRISTI IESV. Subsistamus hic parumper; vt reliquũ historiæ diei hodiernæ percurramus. Quonam modo hic filius Dauid *sedens in cathedra*, nempe in
cruce

cruce docuerit suos, in prioribus concionibus bis iam à me explicatū audistis: nec est quod repetamus; sed est quòd diligenter perpendamus; quomodo *sapientissimus princeps* IESVS, non *inter tres*, sed simpliciter præ omnibus hominibus, cū morti se accingeret, distribuerit bona sua. Audite rogo & sectamini. Minima bona sunt bona externa. Hæc immobilia quidem, quæ vocantur, nulla habuit. Nā deerat illi vbi caput reclinaret suum: mobilia verò, si quæ in bursa communi fuere, abstulit traditor. Solæ igitur vestes ei remanebant: has dedit carnificibus, qui illum crucifixerunt. Videtis quanti hæc ipse æstimet? Neque tunc modo; sed etiã nunc idem facit. Aspiciat quã vocamus mappã mundi, & videte; quã paucasterrenas ditiones totius orbis occupent boni & pij Catholici, præ Ethnicis, Turcis, Tartaris, Hæreticis, Schismaticis, cæterisq; impijs. O si hæc ita, vti conuenit considerarem: quã essemus moderatiores in istis consecrandis, quã nunc sumus: quam multi essemus obedientes dicto illi Apostoli: *Habentes autẽ alimẽta & quibus, tegamur, his cõtenti simus.* Regulam do ex factò Christi. Si affluunt diuitiæ, vide ne cor apponas; sed vt bene illis vtaris. Si desunt, vide ne angaris; cum noris, id non esse signum gratiæ Christi, quòd datur crucifixoribus Christi.

Deinde iniurias & pænas, quas tulit & pertulit acerbissimas, atrocissimas, crudelissimas,

Christus sapientissim⁹ princeps distribuit sua.

J'

Bona externa carnificibus.

Mat. 8. 20

Quod & nunc sæpè facit.

1. Tim. 6. 8
Regula.

2.

Iniurias in se collatas,

& orationē
donat ini-
micis.

simas, condonat inimicis: insuper etiam orat pro eis. Duo igitur illis donat? tum iniurias, tum orationē. O aurea & necessaria doctrina; quam si omnes Christiani sectarentur, quam cito ruinæ cælestes implerentur? Postea thesaurū quē habuit præciosissimum, dedit discipulo suo; Mariam inquā matrem suam Iohanni, & Ioannem Mariæ. Qua de causa? Duplici: vnā iam antè audistis: nempè, quia Virginem virgini commendauit. Alteram ipsum Euangelium insinuat; quia sub cruce perseuerauerunt cū I E S V. Factu idē, caste iuxta tuum statum viuas, & stes perseueranter sub cruce; quā aut ipse I E S V s tibi imposuit, aut tu pro amore eius vltro eam suscepisti: & nihil dubites, tibi Mariam matrē I E S V; te verò Mariæ à I E S V commendatum iri. O fælix anima, cui id contigerit.

3.
Matrem Iohanni, & hūc matri tradit

Docetque perseuerantia coronari

4.
Paradisum donat latroni.

Quid præterea? Dat & donat liberaliter, paradisum; non terrenum, sed cælestem (vbi enim Christus est, ibi cælestis paradus est) latroni; non latroni: olim enim latro fuit; sed postquam de latrocinio suo pœnitentiā egit, non latro; sed pius, sed bonus, sed sanctus fuit: quod euentus & verba Christi comprobarunt. Tu si imitatus es illum in primò, (quis verò aliter de se sentiet; qui quot animas malo suo exemplo mactauerit, serio considerabit) imitare etiam in secundò. Nec differas; ne tibi quod sinistro latroni eueniat. Postea donat nobis robur suum; &

5.
Robur suū dat fidelibus.

accipit

ADMIRATIO ET AMOR.

31

Act. 5. 41.

accipit in se infirmitatem nostram : iuxta
 quàm inquit : **DEVS MEVS VT QVID**
DERELIQVISTI ME. Et iterum, inquit,
SITIO. Rem euentus probauit : tum in A-
 postolis, qui *cæsi ibant gaudentes* ; tum in a-
 lijs martyribus, etiam fœminis ; quæ ad tor-
 menta sicut ad nuptias currebant : tum in in-
 numeris alijs ; qui sitim, famem, & alia cor-
 poris incommoda grauissima lætissimi pro
 Christo sustinebant : in quorum numero
 Paulus Apostolus seipsum collocat. Posthæc
 dicens ; **CONSVMMATVM EST,** dedit Iu-
 dæis quidem finem veteris ; Christianis verò
 initium noui testamenti. Ideò Centurio &
 Longinus Ethnici conuertuntur : ideò sum-
 mus Pontifex in decretis errare incipit ; quòd
 nunquam alias fecit : ideò velum templi scin-
 ditur ; vt interna & spiritualia, externis &
 corporalibus succedant. Tene Catholicè
 quod accepisti, & ita viue, vt tu quoque in
 extremis positus, in veritate dicere queas ;
CONSVMMATVM EST. Nec non illud po-
 stremum ; **PATER IN MANVS TVAS**
COMMENDO SPIRITVM MEVM. qui-
 bus verbis **CHRISTVS** ; quod vltimum &
 præstantissimum habuit, Deo Patri tradidit.
 Hæc *sapientissimus princeps*, ex Cathedra
 sua. Iam reliquum Prophetiæ prosequa-
 mur. Fuit enim **CHRISTVS** non solum
 Princeps ; sed etiam *quasi tenerrimus ligni ver-*
miculus. Tenerrimus inquam, quia nullus
 vnquam

2: Cor. 11.

27.

6.

Dat finem
 veteris, prin-
 cipium no-
 ui testamēti

7.

Spiritum su-
 um Patri
 tradidit.

Christus
 tenerrim⁹
 grauissimos
 suffert do-
 lores.

Christus
ligni Ver-
miculus
dupliciter.

Christus
interfecit
impetu
vno innum-
eros.

Cornua in
manibus
eius.

Hab. 3. 4.
Psal. 43. 6.
TERTIO,
Qua cum
charitate
hæc per acta
fuerint.

Signa stupē-
di amoris.

J.
Cum maxi-
mū pro mi-
nimo datur
Id fecit De-
us Pater.

Isa. 53. 8.

2.
Cum supre-
mus patitur

vnquam illo fuit complexionis tenerioris ;
idcirco etiam parua tormenta magnos ei in-
ferebant cruciatus : quid tanta & talia ? Hæc
tu cogita, & gratus esto. Fuit & ligni vermi-
culus : tum quòd in ligno pependerit ; tum
quod lignum per quod mors in mundum in-
trauit, absq; dentibus corroserit. Denique
iste tam debilis & infirmus vermiculus ; non
oclingentos, vt Dauid ; sed planè innumeros
tum Idololatrias, tum dæmones hodie inter-
fecit impetu vno : illis quidem gratiam conuer-
sionis merendo ; hos verò per cornua quæ e-
rant in manibus eius , clauos videlicet & cru-
cem, ventilando , ac virus viresque illorum
debilitando , dominiumque auferendo. O
potestas, ô bonitas.

Qua verò cum charitate hæc peregerit
vniuersa ; tum Sanctissima Trinitas traden-
do, tum Verbum incarnatum patiendo, quis
enarrabit ? imò quis vel mente assequi pote-
rit ? Attingamus quædam contemplando, &
conferendo excessiuos amores, cum factis
Dei & I E S V. Itaque primum ingentis amo-
ris signum est, cum quis pro minori bono
quod desiderat, dat multò maius ; imò ma-
ximum. Ita fecit Deus Pater ; qui vt seruum
saluaret, vnicum Filium tradidit ad tanta
tormenta. Id^o testatur tum Isa. vt iam audi-
stis ; tum ipse Filius Dei, cum inquit. Sic Deus
dilexit mundum, vt Filium suum vnigenitum da-
ret. Secundum, Quando quis propter rem
vilissi-

ADMIRATIO ET AMOR.

vilissimam exponit se magnis periculis, & subit ea. Ita filius Dei, verbum Patris; vt vilissimum & in gratissimum mancipium redimeret, iniecit se hodie in mare tormentorum, per quæ & mortem subijt turpissimam. Quare? vt vitam daret homini scelerato.

pro iustis sic Filius Dei. Ioan. 3. 16

Tertium indicium maximi amoris est, cum quis contristat suos, vt soletur quem amat; licet & vilem, & ingratum, nequam. Sic fecit Spiritus Sanctus, quando deseruit eum, à quo procedit, & qui secundum humanitatem ex virgine ipso superueniente natus est: hunc enim ita deseruit, vt clamaret quòd paulò ante audistis: DEVS MEVS. &c. Fecit autem id; vt consolationes daret spirituales homini, qui toties eum contristauit; & adhuc, teste Apostolo, contristat. Quartum, cum quis propter eum quem amat, obliuiscitur honoris & auctoritatis suæ. Ita Sanctissima Trinitas propter hominem redimendum, obnubilauit quodammodo & obumbravit attributa sua omnia: cum omnipotens factus est quasi impotens, omnibus se percutientibus cedens: cum sapientissimus, pro stulto reputatus est; tum ab Herode, tum à Iudæis, tum ab Ethnicis. Cum gloriosissimus innumeris afficitur ignominijs: cum optimus pro latrone pendens inter latrones reputatur: cum ipsa iustitia iniudicatur: ipsa æternitas moritur: ipsa immortalitas patitur. Quis ad hæc stupenda

3. Cum optimus deseruitur, vt nequam solamen habeat. Id egit Spiritus sanctus

4. Cum honor nobilissimus obfuscatur ob ignobiliem. Eph. 4. 30. Id Trinitatis opus.

Christi vero IESV in super amor eluceat

5.

Quia quod
parui habe-
ri potuit,
maximi ce-
dit.

NOTA

Psal. 39. 8.

diuini in nos amoris signa non obstupescat!

Præter hæc, in ipso verbo incarnato
CHRISTO IESV, & alia similia amoris mo-
numenta perpendere, & possumus & debe-
mus. Nonne magni desyderij & amoris si-
gnum est; quod paruo precio habere queas,
magno emere? Id verò fecit CHRISTVS:
qui cum vna gutta sanguinis sui; imò solo ac-
tū oblationis post incarnationem, cum im-
pletum est illud Dauidicum: *Et dixi ecce ve-
nio*, posset redimere genus humanum vniuer-
sum, amore stipulante, totum quem habuit
effudit pro nobis suum sacrum cruorem, vs-
que ad vltimam guttam, quæ circa cor late-
bat; quam lancea aperto latere extrahi sibi
passus est post mortem. O amor. Sed & in-
de summa ipsius erga nos charitas visitur;
quod non solum in omnibus quæ habuit,
nempè, in anima, corpore, fama, & alijs cru-
ciatus sustinuit; sed etiam ita illos disposuit,
vt atrociores semper succederent. O miran-
da, veneranda, amanda, tuâ Christe consilia.
Expressit & aliud immensum amoris erga
nos argumentum Paulus, cum mirando, in-
quit: *Christus pro impijs mortuus est: causamq;*
admirationis suæ adfert: vix enim pro iusto quis
moritur: nam pro bono forsitan quis audeat mori.
Audis quomodo dubitat, an reperiatur quis-
piam, qui pro bono moriatur? pro scelerato
verò mori inauditum reputat? Quod tamen
fecit CHRISTVS IESVS. Sit nomen eius
benedi-

6.

Quia maio-
ra semper
sustinuit.

7.

Quia pro i-
nemicis
mortuus,
quod Pau-
testatur.

Rom. 5. 6.

benedictum in æternum. Fuit præterea amor **CHRISTI**; non vt motus violentus, qui in fine flaccescit; sed per modum naturæ, cuius est proprium, quo magis termino appropinquat, eo fortius moueri. Ita **IESVS** quo plus morti appropinquabat, eò intensius amabat. Fuit insuper verus amicitia; cuius munus est, in amore nullum proprium, sed commodum amati quærere. O quam id in **CHRISTO** verum, in nobis rarum. Fuit denique & vnitiuus nimium, & excessiuus vehementer.

8.

Fuit amor in fine intensior.

9.

Verus amicitia.

10.

Excessiuus.

Quid verò pro his omnibus reddemus illi? Non video charissimi: nec puto quicquam in mundo inueniri, quòd amori respondere queat aliud; quam amor ipse. At inquit talem ego reddere amorem nequeo **CHRISTO**, qualem ipse mihi exhibuit. Id quidem certissimum: sed & illud verum; **IESVM** quæ ipsius est bonitas, amanter suscepturum si dederis talem, qualem dare vales. Id igitur agamus obsecro, & per viscera amoris eius obtestor. Modos quibus id fieri debeat, alias frequenter præscripsi: nunc quia multis agendi tempus non datur, istud tantum inculco; vt perpendentes quæ recensuimus miranda in nos diuini amoris argumenta, totis viribus Deum, **CHRISTVM QVE IESVM** redamare studeamus. Nam & si ad eam perfectionem pertingere nemo; illam tamen imitari, omnes possunt. Demus aliquot exempla

QUARTO.
Retribuendus amor pro amore.

Modus imitando Deū.

Exempla
cuatuo.
NOTA.

xempla : Mortuus est IESVS pro inimicis ;
desine tu esse eius inimicus ; sed age pœnitentiam ; quæ initium est amoris Dei : simulq̄
tis paratus in posterum, mori potius, quam
IESVM peccato lætali offendere : id enim est
veri amici. Rursum, emit te CHRISTVS
magni, nempe sanguine suo diuino ; emas tu
illum paruo, facultates tuas pauperibus erogando, & opera misericordiæ exercendo ; vt
ipse te docuit. Item dedit Pater maximum
pro minimo ; des tu illi minimum pro maximo.
Quid enim minus corde tuo ? quid verò
maius Deo ? Fac igitur vt cor tuum thronus
Dei sit perpetuus : fac ne quid aliud velis,
quam diuinam implere voluntatem : fac vt
quantum vales puro corde, ames Deum. Cor
enim receptaculum amoris est. Ad instar
horum tu plura ex dictis collige, & tibi applica,
diuinamque in te charitatem excitare,
augere, perficere satage. Nos verò vnde cœpimus
ibidem finiamus.

Conclusio,
ECCE
HOMO.

Itaque clamo iterum, iterumque: ECCE
HOMO. O anima Christiana, homo inquam,
propter nos, & propter nostram salutem, repro-
batus à synagoga, cum tanta quanta au-
diuistis impietate : cruci affixus ab Ethnicis,
cum tanta crudelitate : oblatuſ à Patre, cum
tanta charitate : deploratus à Matre, cum
tanto dolore : susceptus ab Ecclesia, cum
tanto honore : ECCE HOMO. Intuimini
& imitamini eū, singula membra corporis i-
pfius.

Aspiciant
eum.

pius: & cum matre vestra Ecclesia honorate
 eum; non verbis tantum & lingua, sed magis
 opere & veritate. **ECCĒ HOMO.** Pontifices. Aspici-
 te ergo cum vos inprimis o pontifices, & pasto-
 res: aspici- te summum Pontificem, & Pasto-
 rem, animam suam ponentem pro ouibus
 suis; vt & vos ad id præstandum armemini. Sacerdotes.
 Aspici- te sacerdotes primum sacerdotum, ho-
 stiam immaculatam Patri immaculatè offe-
 rentem; vt & vos sancti & immaculati exi-
 stentes, Sanctissimam hostiam istam quoti-
 die sanctè offerre Deo valeatis. Aspici- te Re-
 ges, Nobiles, Domini, Regem regum & Do-
 minum dominantium, corona spinea redi-
 mitum, pendentem in cruce; vt vos tum à
 tyrannide, tum ab omni inordinato honoris
 ambitu absterreat. Aspici- te iudices supre-
 mum iudicem, iniustè condemnatum; vt
 vos vestri admoneamini officij. Aspici- te de-
 nique verbis vos alloquar Apostoli; O Chri- Iudices.
 stiani vniuersi. *Aspici- te ad autorem fidei, &* Omnes ex
consummatorem IESVM; qui proposito sibi gaudio, D. Paulo.
sustinuit crucem confusione contempta. Heb. 12. 2. Aspici-
 mus igitur dilectissimi, ad autorem fidei nostræ,
 illique fidem datam seruemus fideliter; aspi-
 ciamus ad consummatorem IESVM; vt & nos,
 iuxta vocationem quilibet suam consum-
 mati reperiamur. Sustinuit ille voluntariè
 crucem propter nos: sustineamus nos quo-
 que ea, quæ nobis imposta fuerint, libenter,
 & alacriter. Contempsit confusionem Do-
 minus

PAS. DNI. NOSTRI IESV CHRI.

minus I E S V S ; cui omnis honor & gloria debebatur, confusionem nostri causa tolerando : contemnamus & nos, qui omni confusione digni sumus eam, propter illum, obsecro & obtestor : ita vt nullum, propter quamuis confusionem tolerandam, peccatum mortiferum committamus vnquam. Id enim si fecerimus, ad propositum gaudium perueniemus certissimè ; Vbi CHRISTVM IESVM Dominum nostrum, viuentem & regnātem in æternum videbimus. AMEN.



8382

7376.

